

四庫全書

集部

欽定四庫全書

集部

草堂雅集卷二

詳校官中書臣丁榮祚

助教臣常循覆勘

總校官中書臣朱 鈐

校對官中書臣范 鏊

謄錄監生臣朱錫彤

欽定四庫全書

集部八

草堂雅集

總集類

提要

臣等謹案草堂雅集十三卷元顧瑛編瑛早

擅文章又愛通賓客四方名士無不延致於

玉山草堂者因仿段成式漢上題襟集例編

唱和之作為此集自陳基至釋自恢凡七十

人又仿元好問中州集例各為小傳亦有僅

載字號里居不及文章行誼者蓋各據其實  
不虛標榜猶前輩篤實之遺也其與瑛贈答  
者即附錄已作於後其與他人贈答而其人  
非與瑛游者所作可取亦附錄焉皆低書四  
格以別之蓋雖以草堂雅集為名實簡錄其  
人平生之作元季詩家此數十人括其大凡  
數十人之詩此十餘卷具其梗槩一代精華  
畧備於是視月泉吟社惟賦田園襟興一題

惟限五七言律一體者賅備多矣是書世罕  
傳本王士禎居易錄記朱彞尊於吳門醫士  
陸其清家僅一見之此本紙墨猶為舊鈔疑  
或即陸氏本歟乾隆四十三年六月恭校上

總纂官

臣紀昀

臣陸錫熊

臣孫士毅

總校官 臣陸費墀

多矣已乃自書

提要

欽定四庫全書

草堂雅集卷一

陳基

元 顧瑛 編

字敬初台之臨海人明敏好學受知於晉卿黃先生明春秋後以舉子業無益於學克志為古文詩章同輩雖極力追之不能及名重于時游京師公卿爭與之交而其德性慎重事親尤盡孝望而知

其為君子也

王氏三世孝感詩

惟蜀嘉州有王氏在昔遭兵中流矢鏃入骨間創發髀  
疾在翁身痛居子恨不捐軀代翁死焚香籲天誠有以  
願減身年益翁齒天祚若翁旋病起他年翁子疽發背  
十竅聚攻復大潰翁孫赴神神請帝背忽無疽子亡斃  
孫獨何辜丁困窮一股不信瘰乃躬病莫出門憂患攻  
絕粒待盡兒忡忡念昔異疾纏二翁天實為之哀厥哀



我獨能忘報父終一兄三季情所鍾蒲伏致禱精誠通  
步履復故行若風君家孝感能如許我一聞之淚交下  
孰則無兒孰無父王氏似孫孫似祖秦人棄恩如棄土  
箕帚擾鋤尚堪數

僕嘗夜夢從彥成飲彥成曰此荔枝漿也飲之令  
人壽子能為我賦之當贈三百壺予因口占一詩  
覺乃夢也及會玉山聞彥成釀酒果名荔枝漿白  
以所夢不覺大笑

涼州莫謾誇蒲萄中山枉說松為醪仙人自釀貞一酒  
洞庭春色嗟徒勞瑤漿滴盡生荔枝玉露瀉入黃金卮  
一杯入口壽千歲安用火棗并交梨不願青州覓從事  
不願步兵為校尉但令喚鶴更呼鸞日日從君花下醉

寄蕭尊師

我昔山中尋紫芝道遇真人行若飛自言鍊骨有仙術  
曾事神農為雨師一從別後三千歲不住塵寰即方外  
我昨題詩遺羨門為問真人定安在答云往日隱東蒙

上下風雨騎蒼龍只今賣藥居靈越來往三吳弄明月  
天上非無十二樓人間乃復愛滄洲時時跨鶴乘雲氣  
歷覽無窮隘九州勞生苦為塵緣縛安得從之超廣漠  
手折三株海上花去隨鸞鳳巢阿閣

寄姚子章

聞君又作錢塘客多在青樓少泉石佳人姓蘇名小小  
占斷西湖好春色沙棠為舟桂為槳驚起鴛鴦飛兩兩  
有時醉倒百花間不記六橋新月上行樂須當少壯時

英雄自古皆堪悲歸來莫負張京兆鸚鵡牕間喚畫眉

偶成

武陵溪水碧灣灣窈窕幽期不可攀戴勝桑間飛自得  
王睢洲上語相關歌成桃葉臨流和采得蘋花帶月還  
見說荔枝漿已熟不分涓滴到人間

南州五月尚兼衣白苧牕間未脫機青李來禽書不至  
荔枝盧橘賦多違水晶簾箔圍晴晝艾納鑪薰逗夕霏  
為問上都城裏客菖蒲花發幾時歸

賦楊花

巷南巷北晝冥冥  
搖蕩春風未肯停  
薄命不禁巫峽雨  
前身曾化楚江萍  
已於謝女詩中見  
更向劉郎曲裏聽  
腸斷不堪回首處  
並人飛過短長亭

次錢伯行韻

五月東林水竹涼  
新荷葉小柳絲長  
且臨大令鸞羣帖  
不戀尚書雞舌香  
楚客謾誇千樹橘  
杜陵共愛百花莊  
滿天風露枇杷熟  
歸奉慈親取次嘗

次沈仲說韻

棟樹飛花雪打篷  
居人行樂四時同  
波涵大澤平如掌  
雲割西山半入空  
金刹遠瞻樓閣壯  
畫船爭載綺羅紅  
如何越女承恩後  
不逐吳王住甬東

送李錄判之饒州

閭門柳枝短  
君行不可緩  
贈君不折楊柳枝  
勸君飲此  
金屈卮  
丈夫將身擔許國  
安用當歌傷別為青絲  
絡控  
黃金勒  
遊宦鄱陽山水國  
何處春風最憶君  
琵琶洲上

蘼蕪碧

送曹生侍親還琴川

愛此丹山五色毛  
綵衣初剪映仙桃  
奉親喜有銀絲鱠  
贈別慙無金錯刀  
洲渚春深生杜若  
江湖波暖漲蒲萄  
王褒擬奏賢臣頌  
肯學山人索價高

山行

莫入山莫入谷  
車連連馬逐逐  
谷深無人山矗矗  
馬行不前車踟躕  
平原五月莎草綠  
黃羊有羔牛有犢  
居人養

老無失肉山行不如原上宿原上宿一枕清夢長明朝  
我欲歸故鄉作書為謝右校王願君白首不相忘

送俞紹芳還京兼寄沃呼元常

翩翩南國佳公子犖犖高懷不可羈相府蚤傳鸚鵡賦  
儒林曾睹鳳凰儀賈生名為吳公重李白才因賀老知  
賓主東南推具美雲龍上下喜相隨十年載筆依金馬  
萬里乘輅訪武夷朝野欣逢起遺逸關山寧復厭驅馳  
嵇康懶惰真成癖阮籍疎狂只自悲親老每蒙朝士問



塗窮那免世人嗤  
黃河西畔平如掌  
秦華雲間翠入眉  
歸見燕山劉戶部  
願將忠孝答明時

寄危太樸楊季子魚呈惟中學士

閣中危老近何如  
闕下楊生一字無  
未省何時度灤水  
可能八月到燕都  
筆削已聞歸太史  
論思猶喜及洪儒  
由來漢室文章盛  
只數班郎製作殊

次韻笠澤漁隱二首

隱君於此攬清華  
小築茅堂傍水涯  
蒲柳高低迷曉岸

鳧鷖來往弄晴沙  
輞川別置王維業  
竹迳深通蔣詡家  
復恐秋潮沒沙渚  
故安小艇當乘槎

目斷江湖欲盡頭  
放船曾作漾陂游  
接羅倒著山公帽  
紫綺時裁李白裘  
鮫室杼機風雨夜  
漁家燈火水雲秋  
舊時賓客多星散  
誰寫江南宋玉愁

題笠澤福地

笠澤真人福地深  
杖藜秋日此幽尋  
波涵太乙星辰動  
雲鎮蓬萊觀闕陰  
靈樹三花皆結玉  
丹砂五色總成金

慢亭別有通仙路留與曾孫宴古今

織錦圖

佳人織錦深閨裏恨入東風淚痕紫三年辛苦織回文  
化作鴛鴦戲秋水秋水悠悠人未歸鴛鴦兩兩弄晴暉  
料應花發長安夜不見閨中腸斷時

次韻趙君季文贈杜寬吹簫篋吟

寒竹初栽蘆葉秋夜吹百花洲上樓千金縱有狐白裘  
難買杜寬一藝優妙知音律同齊鄒薛家小童安敢侔

江空月白爛不收冥搜罔象悲陽侯哀泉鳴咽秦隴頭  
何年變曲為涼州神工太古開黃牛驚浪出峽風颼颼  
葉落秋隨渭水流渭水有盡情無休縣縣又若繭緒抽  
要眇寧以智力求須臾水激龍騰湫熊羆夜咆魑魅愁  
勸君不用皓齒謳側耳聽此消百憂寬也胡為此淹留  
自今天上參鳴球飄然我欲歸帝丘仙人張樂烟霧浮  
蒼龍為車挾翠虬千秋萬歲遲子同遨遊

寄友人

扁舟三月到江城  
疋馬先尋北郭生  
雨過小樓春寂寂  
鳥啼脩竹曉嚶嚶  
家無黃耳傳鄉信  
門有蒼頭記客名  
見說終南真可隱  
賸拚秋色為君清

寄匡山人

早春相見又經秋  
秋水迢迢阻汎舟  
每見玉山問消息  
荔漿何日寄江樓

題曹將軍馬圖

神駒生長渥洼中  
一匹能令冀北空  
貌得真龍九重上

金史卷一百一十五  
卷一  
將軍筆法老逾工

題葛仙翁移家圖

是處青山可鍊丹，問君拔宅向何山。  
縱令兒女恩情重，雞犬何心不肯還。

再題葛仙翁移家圖

列仙之人其道無為超然物表，游於希夷，厚祿不足致好爵，不足縻。所以許由辭堯，不受禪巢，父聞之猶為洗耳河之湄。奈何葛仙翁與世猶支離，求為勾漏令，所欲

何卑微觀翁此行亦良苦妻子辛勤童婢飢翁知學仙  
不學吏委以民社將安施仙家雖云足官府奈此人間  
小點并大癡君不見陶潛棄官歸故里又不見馬援謗  
興由惹茲縱得丹砂亦不多誰信翁心澹如水雲門山  
有靈藥歸去來山中樂牛羊任所之雞犬從人縛急將  
印綬送還官變却姓名稱抱朴

奉和紅梅引

緘情脈脈待春來差勝苦寒時節開丞相圃中香寂寞

水曹亭畔錦培堆致身合在黃金闕濁世紛紛妬高潔  
却施脂粉學時粧林下風神本清絕富貴西岡一夢醒  
獨憐標格尚分明認桃辨杏相嘲詠徒費詩人衆口爭  
春風如酒醉入髓暈上冰肌頰不俚化工於物豈容私  
暖在南枝真有幾和羹未說帝者師且先羣木占園池  
他年擬結羅浮好託以女蘿如兔絲兩家臭味元相似  
安用昆丘問玉卮

雪後見梅有懷



華屋邊頭春信早梅花樹樹向南栽主人每愛凭闌看  
佳客從教著屐來風靜池塘鳴翠羽雪殘庭院見蒼苔  
閒居未許安仁賦天上黃金正築臺

題杏花鬪鵲

爾鵲莫逐朝飛雉雙雌爭雄俱鬪死爾鵲莫逐營巢燕  
吳宮失火難相見飲啄不離碧山阿棲止還依嘉樹柯  
王孫縱有黃金彈紅杏花間奈爾何

題昭陵六馬圖

秦王六馬一何驍生死同心鄂與褒酣戰每將戈止日  
並驅長使血生毛流傳弟子初名幹服事將軍老姓曹  
貌得真龍九重上昭陵刻石世同高

次韻武夷島梅花

一灣新月浸瑤天琪樹花開朶朶妍帝子乘風游小水  
玉妃和露泣疎烟碧波夜濕清虛府綠渚春餘綽約仙  
若遇羅浮煩問訊少將華髮感流年

顧瑛詩曰綠波蕩漾鏡中天瓊樹春迴玉蕊妍

苔雨青青空落月溪雲漠漠不成烟臨風望斷  
緱山侶照影疑逢洛浦仙王母欲來青鳥下暗  
香如水夜如年

題匡山人所藏圖

千尺飛流落半空散為烟雨晝濛濛草堂留在匡廬曲  
頭白歸來掩靄中

君住耶溪南

君住耶溪南我住耶溪北咫尺不知名采蓮始相識君

愛蓮有花我愛蓮有實花實本同根君心勿相失

送君當遠涉

送君當遠涉蘭舟桂為楫君去不思家妾夢長相接采  
蓮將遺君采花不采葉妾貌不如花君心不如妾

貞女慎行露

貞女慎行露君子戒履霜歲暮懷百憂離居增慨慷方  
舟豈無楫河水亦可杭臨流不能度佇立以徬徨

芙蓉洲

草亭寂寂倚中洲  
風景依依舊日游  
江女蕩舟歌水調  
溪翁結屋擬菟裘  
花迷島嶼紅雲暝  
香冷陂塘白露秋  
莫向山陽吹短笛  
晚來沙鳥不禁愁

題柯博士墨竹

京洛緇塵染素衣  
故園清夢苦相思  
歸來無限江南意  
寫作春風暮雨枝

題徽廟馬麟梅

內家春色少人知  
玉蕊冰蕤看轉宜  
說與宮中小兒女

畫樓瓊瑄莫輕吹

題趙翰林畫桃花馬

當時沙苑最權奇  
贈與吳興學士騎  
身上桃花千萬朵  
為渠圖寫墨淋漓

題趙翰林唐馬

王孫昔侍金鑾殿  
親見天街進馬來  
貌得權奇大宛種  
解教人世識龍媒

題管夫人竹

綺牕春影綠婆娑  
夢作輕雲覆碧波  
日暮是誰調錦瑟  
一江煙雨泣湘娥

題趙千里臨李思訓金碧山水

山上白雲朝暮生  
雜花流水總關情  
相思把筆題招隱  
千尺長松獨鶴鳴

題朱澤民山水

東曹興逐秋風起  
長揖齊王歸故里  
託言鱸膾與蓴羹  
遠害全身良有以  
神交海上陶朱公  
遭世雖殊心則同

讀書把釣松江尾  
仰看浮雲行太空  
八月嚴霜下喬木  
萬里青冥眇飛鵠  
為謝長安馬上郎  
世間何物為榮辱

題漁亭秋望圖

霜露洗空河漢濕  
西風蕭蕭江水凜  
綠洲孤亭小如笠  
上有高樹皆森立  
九疑青青愁欲泣  
翠華零落何人拾  
寶瑟空彈鴻鴈斜  
蒼梧帝子不歸家

題白描湘靈鼓瑟圖

斑斑湘竹淚痕深  
望斷重華隔遠岑  
花落黃陵春水濶



至今鼓瑟有遺音

題雙雉圖

馬蹄朝踏杜陵塵  
野雉飛來不避人  
况是太平游獵少  
上陽風日自成春

題王元章梅

武陵溪上桃千樹  
亦有寒梅照水開  
一種春風標格在  
太平恩澤為栽培

題從子倫畫風梅花鴨

溪山風日兩相宜更著文禽汎綠漪自媿無才似山簡  
為君題作習家池

題白描水仙

汗漫海上期嬋娟池中影麻姑殊未來相思月華冷

題二馬圖

一種權竒產渥洼暖風晴日過平沙尋常不敢施鞍鞞  
知是君王白鼻駒

題洪崖居士出山圖

張公不出山出山動千歲時騎白羸子狂歌每伴醉悵  
望王屋深緬焉起遐睇

和新安梅韻寫玉山後

月照山中梅蓋新暗香疎影兩相勻素衣不受緇塵染  
同是祇園樹裏春

天然標格賦清新冷蓋疎枝不自勻久與梨花不同夢  
何勞惆悵惜芳春

雪裏俄看一蓋新空花頃刻已俱勻不知色相皆虛幻

那信優曇別有春

玉山和張師夔詩曰寶地生春玉蕊新苔烟如  
霧翠光勻山僧分得維摩供三素雲中別有春

題凌波飛蓋

落落秦大夫皎皎漢臯女賦質新且殊託根乃一所願  
結歲寒心不憚風雪苦猶勝河漢間脉脉不得語

題綠陰亭

嘉樹蔭華屋空庭生晝涼端居宴冲穆餘響答滄浪月

冷芙蓉帳雲深薜荔牆  
焚香坐深夕幽興似韋郎

題水仙

水蒼為佩玉為人素質娟娟不愛春  
終古關雎遺德化  
禮防游女漢江濱

題山居圖

曉出城南二里餘  
烏啼花落暮春初  
杜陵韋曲山無數  
何處林塘可卜居

題明雪牕蘭

金文選卷一  
卷一  
曾從北渚過君山更向黃陵廟下還  
帝子不歸芳草碧  
鷓鴣啼處雨斑斑

題三白士女

長松百尺吹天風仙人憑虛離紫宮  
明月掛樹雲容容  
褰衣獨憩流青瞳炯若秋水涵芙蓉  
玄霜未下珠露濃  
桂樹偃蹇山龍從烟蘿空青深太古  
薜荔吹香雜蘭杜  
渴飲石泉飢瓊蓋逍遙不比巫山女  
朝為行雲暮行雨  
人間回首空塵土何如丹丘與玄圃  
珊瑚然玉珮風泠泠

羣仙夜誦蕊珠經，紫金之冠朝玉京。  
青幢絳節鳳凰笙，蓬萊弱水今淺清。  
何當從之拾瑤英，一往不死三千齡。

文殊寺高閣

何年蘭若倚崔嵬，觀閣連天罨畫開。  
澤國魚龍霜後靜，關河鴻雁日邊回。  
闌干迴遡虛空上，歲月深從浩劫來。  
自信平生愛登覽，夕陽高處重徘徊。

重游文殊寺次錢伯行韻

野舟閒艤白鷗沙，同訪文殊大士家。  
滿地夕陽人散亂，

一天秋色雁橫斜江楓冷墮蕭蕭葉山菊晴開細細花  
歲晚登高重懷古轉驚兄弟隔天涯

鴻雁篇

鴻雁雙雙度雁門相呼相喚不離羣晝銜蘆荻防繒繳  
夜宿關河同夢魂稻粱既足江南濶秋水增波葉微脫  
洞庭湖畔卧雲沙彭蠡磯頭弄烟月一朝無事忽相違  
一向東飛一向西西飛渺渺秦山曲東去悠悠滄海湄  
秦山滄海遙相望顧影徘徊各惆悵山有鼉鼉與網羅



水有蛟鼉與風浪回頭却恨不同棲  
辛苦皆因獨自飛  
不問天南與天北何時相見得同歸

寄錢伯行

小堂闐寂俯漁磯江月留人坐不歸  
半吐野梅疑索笑  
並棲沙鳥忽驚飛孤煙隱隱團晴色  
修竹娟娟弄晚暉  
不是錢郎期不至也應安樂戀庭闈

寄實喇卜伯溫秘卿

君侯高義重南金欲奉馳驅媿不任  
劉向傳經心獨苦

馬遷載筆意何深朱幡未許分符出華髮懸知兩鬢侵  
日日燕山有飛雁帛書都不寄江潯

遣懷

策杖江臯每獨行園林二月未聞鶯紅塵陌上應千尺  
白髮春來又幾莖自分才疎甘屏迹久擠人棄任浮萍  
漢庭亦有中常侍安得才如馬長卿

過袁靜春先生墓

每讀遺文為悵然一盃今酌闕河邊空餘玄晏先生宅

不見山陰道士船日暮蛟龍歸近浦春深鷗鷺散平川  
佳兒也復能傳業白首躬耕於墓田

寄衍上人

屏迹江湖懶曳裾縱觀物理愛逃虛清明已過百花盡  
穀雨又逢三月初豈有拾遺躑句癖漫慚中散絕交書  
只應為結廬山伴蓮社相從意有餘

次韻袁仲長竹堂感興

一曲桃源憶故人白頭詞客最傷春南柯已寤平生夢

東海曾揚幾劫塵綺樹鶯花徒自好畫堂絲竹為誰陳  
不須聞此空惆悵且看瑤姬舞繡茵

題雨竹

二月江南春雨深帝子不來勞我心所思只在潯陽浦  
吹徹參差作鳳吟

橫翠樓

虛樓直上面羣峯積翠氤氳一萬重晴散岩扃時隱豹  
晝為雲氣或從龍寶花自落元無蒂天女空行不見蹤

絕境世人應莫到漫聞烟際動疎鐘

題柯博士畫

丹丘仙子渺何之零落春風玉樹枝阿閣鳳凰無處宿  
漫勞湘管月中吹

送危太樸四首兼簡金華黃先生蘭溪吳博士

海內聞名二十年班荆長記客幽燕天官載筆推良史  
延閣談經列衆賢三月風花愁送別五湖春色好言旋  
只緣鞍馬勞王事未許扁舟聽雨眠

故人追遞日邊來駐馬江亭訪草萊談笑豈惟能愈疾  
歡娛兼肯共持盃李膺舟裏神仙侶郭隗臺中國士才  
芳草萋萋天欲暮送君南浦思徘徊

壯懷皦皦負經綸匹馬翩翩走驛塵南國梅黃逢細雨  
上林鶯老憶餘春名山盡擬搜玄秘滄海寧忘問隱淪  
若著清朝耆舊傳金華遺得老成人

秦伯城中五日游懶騎官馬厭登舟步尋鄭老通宵語  
坐愛黃山竟日留只把簡書詢故舊不將名姓答諸侯

石榴花發綠江去應訪蘭溪一散愁

寄鄭山人

萬里江湖一羽毛相思終日阻波濤山光并入終南秀  
月色偏依少室高天祿圖書通白虎蓬萊宮殿湧金鰲  
丈人不忝更生輩歲晚寧辭讎校勞

安石榴一首寄鄭山人

江南朱夏石榴繁絳萼紛披向日翻恩與荔枝登玉食  
榮兼蒟醬入金門偶聞六實同根蒂遂託千房詫子孫

為謝漢庭張奉使相如白首向文園

寄沃嘒彥文

幕下惟君最少年  
青春相憶路緜緜  
已推宋玉能為賦  
却笑揚雄尚草玄  
千里獨看吳渚月  
一書不寄楚江船  
致身好在青雲上  
莫漫登樓學仲宣

次韻陳叔方見寄魚簡沈仲說二首

作客不自慰懷人  
如酒中雨深芳草碧  
春老落花紅自  
笑嵇康懶誰悲  
阮籍窮知君情最重  
應念跡飄蓬



把酒愁無賴看詩獨眼明性兼陶令達才共庾公清山  
暖櫻桃發江春杜若生思君臨水上沙鳥亦忘情

次韻錢伯行飛雲樓小集懷王季野

為惜春光一半過如澠美酒汎金波共知此會情偏重  
獨恨平生飲不多鼓瑟欲終仍緩節投壺纔罷即高歌  
却憐燕子樓中客蘇小橋邊奈樂何

賦朝采江上蘋送陳伯善

時伯善  
新婚

朝采江上蘋蘋生江水潤采之欲何為言贈新知別新

知行奉親綵服照青春不因裁剪好安得著來新去去  
辭南浦春波趁柔櫓還復念離居丁寧託鸚鵡珍重早  
回舟蘋花不奈秋但令潮有信莫倚草忘憂

謝袁可立惠盧橘

風露離離餘萬顆故人遠致自題封幸分嘉實當朱夏  
不負幽花款暮冬南國情多書漫答上林才薄賦難攻  
獨憐此日庭闈裏甘旨全勝荔子濃

寄朱元達

扁舟西望渺無端，萬頃波濤一釣竿。  
杜若洲邊思謝朓，鱸魚江上憶張翰。  
蒼山著雨情逾秀，綠樹藏雲晚更團。  
乘興何時訪幽獨，對眠江閣聽風湍。

題張鍊師所藏畫梅

幻藥能招水月魂，蓬萊宮殿集靈芬。  
誰將處士明珠佩，獨贈仙人萼綠君。  
海國有香飄艾納，洞天無夢化梨雲。  
春風想見瑤池會，瀟灑真妃玉作羣。

送華亭杜縣尉

六月松江如早秋木蘭為楫沙棠舟南郡神仙來作尉  
西都恩澤會封侯種柳暫隨陶令隱賦詩應共陸機游  
送君鷓鴣灘前路令我相思欲白頭

寄葛子熙楊季民

有序

去年客京師與江西葛子熙楊季民飲于濟南  
張署令家以櫻桃薦酒時季民將赴灤陽屬予賦  
詩而子熙為之書予還江南一載而二子尚留  
京師張君亦未離太常感時撫事悵然興懷因

賦長句一首奉寄

去年京國櫻桃熟公子親沾薦廟餘色映金盤分處近  
恩魚冰酪賜來初酒酣惜與楊生別詩罷叨從葛老書  
今日江南春雨歇亂啼黃鳥正愁予

留別張熙載

短棹攜書又入郢臨流分杖重踟躕形容自笑如樵客  
行止誰令類賈胡綠渚風光回杜若白沙晴色上蘼蕪  
期君一日誠千里莫負翩翩汗血駒

寄申屠彥德

春風浩無蹤綠遍江上草游子行未歸關山一何杳白  
日不可留朱顏豈長好按劍歌慷慨憂思結懷抱子桑  
獨何為簞食常不飽展禽亦三黜中懷惟直道貧賤豈  
足憂仁義乃為寶黃鵠棲崇丘嘉魚泳深藻所期乘風  
波萬里終可保

次韻吳宗師生日感恩詩

化國真人慶日長五雲晴色映金堂草徵漢室芝房瑞

露浥堯時寶甕漿  
桂觀燕居凌倒影  
行宮齋宿候朝陽  
咏歌恩澤期天保  
傳到人間雨露香

簡鄭山人

國士文章海內傳  
丘園風雨故依然  
空聞太守延徐穉  
猶喜諸生禮鄭玄  
官樹鶯啼初繫馬  
講堂雀下或銜鱣  
廣文方築招賢館  
肯使先生老一氈

送庸田司寶惟善經歷

籍甚中朝彥  
翩然萬里情  
禮從蓮幕重  
詩到水曹清  
未

雪辭吳會先春入薊城殷勤黃閣老能不問蒼生

送姚子章調浙東帥府令史兼簡楊大中錄判

昭代眷東國土壤際窮髮開閩泄四明元帥秉節鉞所  
敦在詩書車馬時簡閱內以撫蒸黎外以綏頑黠辟置  
幕府下詎可非俊傑姚君古遺直豈肯事乾沒侯藩樹  
風聲漕府淹歲月簡拔寶至公一洒時論缺丈夫志卓  
犖誰能受羈紲但念儒冠微彌縫乃無闕祖道城東門  
君馬行已秣飲酒不盡歡贈言答敢輟野水汎勾吳



名山滿甌粵相望各異鄉  
春漲溟海潤有懷楊功曹為  
政已英發君行當見之為我道離別

送庸田劉運使赴閩

三年溝洫敢論功  
恩與鹹臺禮數崇  
水部有詩皆似錦  
使君無馬不為驄  
勝游不憚三山遠  
薄賦欣逢四海同  
嘗罷檳榔有餘味  
佳人休說荔枝紅

劉向平生經濟才  
獨違鸛鷺久徘徊  
鶴書又赴鹹臺去  
虎節還從水部來  
路入七閩連百粵  
心依五嶺望三台

遙知別後書堪寄春近南雲有雁回

次韻叔方寄沈仲說

公子新成江上宅更依西渚結幽亭時清墟里還無警  
月黑柴扉不用扃流水暗和琴瑟響好山濃入畫圖青  
故人白雪歌難和孺子滄浪曲自聽每厭狂夫談酒譜  
還從處士授茶經庭前賸折忘憂草不負君家玉膽瓶

八月十三夜汎姚城江二首

畫船搗鼓唱回波皓齒青蛾不用歌好月愛看輪未滿

清秋莫問夜如何  
明將織女機  
絲動寒恐姮娥白髮多  
天上清光應更足  
羽衣安得共婆娑

何年江水出姚城  
轉覺東南地勢傾  
彩月夜當河漢動  
客星秋入斗牛明  
一波不起魚龍靜  
百穀初登海宇清  
生喜太平身少壯  
浩歌擊楫豈無情

次韻答張庸

我行四方今始歸  
回視所歷皆堪悲  
關路崎嶇望無極  
精魄摧喪難為持  
前瞻平陸若可取  
振轡頃刻俄已非

嗟哉微命犯重險念此憂患何當違  
崢嶸亂石無改轍况復霜露沾裳衣  
天寒日暮豺虎呼山空木葉猩鼯飢  
長安薪米如桂玉環堵蕭然抱羈獨  
平地波濤劇艱阻豈但長溪與深谷  
雖無良田負東郭賴有詩書貧可讀  
平生志願在溫飽胡不還家共燈燭  
驅車不返竟何為妻子山中向天哭  
王侯第宅與雲齊五陵衣馬皆輕肥  
富貴由來歸世冑安用經術研精微  
故人張生非碌碌投我長謠兼短曲  
才華如此年尚少一掃能令千兔禿

憂來為我發浩歌張生張生奈爾何人間岐路何其多  
次家兄之湖州兼簡同府判沃呼叔敬教授

結髮相從讀父書故園茅屋總荒蕪漫嗟案筆依公府  
終勝雕蟲作陋儒菽水粗能為母具菜羹猶可備兒需  
殷勤好去酬知己莫待秋霜上鬢鬚

異鄉兄弟那堪別况是江空歲晚時薄祿重為慈母計  
綈袍深戀故人知綠波亭下鷗盟近碧浪湖頭雁影遲  
為謝郡中賢判府此行應不負驅馳

安定先生足典刑金源文學播芳馨已承博士尊三傳  
更飭諸生授五經馬氏有兄眉最白阮家諸老眼偏青  
水精宮裏神仙府為借清風送鶴翎

西墅

西墅幽期每自知晚來無物不宜詩白蘋點綴秋波遠  
紅樹留連落照遲親老正當貧賤日身輕深荷聖明時  
可能便把投竿手來問漁翁覓釣絲

簡陳子貞

丞相流風久未泯，丈人才力老逾新。  
周南每恨留司馬，谷口誰能問子真。  
九月風霜蟲亂蟄，五湖煙水雁來賓。  
相逢莫漫嗟遲暮，欲把遺經究獲麟。

次韻錢伯行中秋詠月

桂影婆娑白兔閒，九霄風露滿江山。  
斗牛直上天常近，河漢西流夜莫攀。  
織女機絲清淺際，姮娥宮殿有無間。  
坐看博望乘槎處，安得相從萬里還。

臺觀參差近，廣寒金莖承露玉。  
為盤誰知天上中秋月。

却向人間獨夜看此夕屢驚烏鵲夢當時羞著鷄鷄冠  
可憐牛渚磯頭客不遇將軍興亦寬

聽寧上人彈琴

忽忽歲將晏鬱鬱不自聊况兹霜露集驚飈振寒條之  
子從何來攜琴過蘅茝為我理素曲五音紛以調莊聽  
斂手坐幽憂為之消鸞鳳戲雲中餘音相與飄別鶴警  
宵露衆葩悅春朝婉麗不可極忽復變蕭索清風散六  
合白日耀層霄流水一何深泰山一何高聘魯慨觀樂



適齊感聞韶疇知今日樂俯仰千載遙寤言欲報之媿  
乏英瑤瑤

秋日過杞菊別業二首

扁舟遠赴故人期出郭東行慰所思  
角里兒孫猶種菊  
輞川賓客搃能詩  
尊前醉舞攜如意  
花下狂歌倒接羅  
欲訪汾湖高士宅  
隔江煙樹晚參差

曾是吳松江上客  
片帆今日重來過  
未從地主求田舍  
先問溪翁覓釣蓑  
霜露滿洲丹橘熟  
烟波維艇白蘋多

臨流為洗煩囂耳一聽滄浪孺子歌

雲文閣為鄆伯常賦

公子愛修潔宴坐焚椒蘭朱火生清煙網緼升博山喬  
雲成五色佳麗不可殫忽然為芝蓋輪囷殊未闌輕風  
散紛郁流芳花竹間曲戶春窈窕綺疏日闌珊霏霏縈  
舞袖歡樂有餘閒

夜坐懷二君子

良夜殊未央明星一何爛懷人阻層城邈若河與漢棲

鵲驚露叢落葉依井榦據梧不成彈惻惻空嗟歎

許具瞻之官武義

江水蕩蘭舟青山入畫樓邑人迎令尹還似魯中年風  
水三年別兩地同明月不寄越西書令人生白髮莫訪  
赤松家休栽滿縣花甘棠如可護留與邑中誇

題幽竹萱草圖

為陳元  
禮作

報妾平安信知君遠戍身好花難作佩留慰北堂親

題鉤勒竹

金夕日五  
卷一  
素節亭亭不可移  
珊瑚為榦玉為枝  
高堂歲晚看圖畫  
彷彿清風見伯時

元夕

畫堂燒燭照初晴  
緩節安歌間玉箏  
火棗種成玄圃樹  
芙蓉開滿化人城  
香飄洞府春迢遞  
月轉銀河夜淺清  
腸斷一聲金縷曲  
佳人疑是許飛瓊

送韓與玉北上兼呈張先生仲舉

總角曾為同舍生  
春風玉樹照人清  
關西早事張夫子

洛下爭迎陸士衡，草入瀛洲春漸綠。  
日臨鳩鵲雪初晴，漢家文物西都盛。  
獨有甘泉賦未成。

南國高人有俊才，青春獻賦上蓬萊。  
飄零不飲新豐酒，慷慨還登郭隗臺。  
太液恩波春潏灑，五陵佳氣日崔嵬。  
北門供奉如相見，好寄平安兩字來。

送韓執中同韓與玉北上

春光三月滿神州，公子翩翩逐俊游。  
江漢不傳王粲賦，關河同汎李膺舟。  
玉城迢遞將烟繞，金水縈紆並日流。

公集卷之八  
卷一  
摠是少年同舍客驪駒一曲迴添愁

題四明悟真觀蕭爽軒

白玉蟾  
嘗留題

蕭爽東南福地開五雲樓觀鬱崔嵬逸人或佩蒼龍下  
王母時乘紫氣來山色龍從開齒苔地靈歛吸領蓬萊  
玄都壇上題詩客浩劫朝元獨未回

寄王可矩尚書

生逢堯舜坐明堂身佐夔龍入廟廊每以經綸裨衮職  
豈惟文采動鵷行人來洛下無書寄春到池南有雁翔

早晚定趨青瑣闥從容能不問滄浪

寄沃呼元常御史

布衣夙忝故人知痛飲狂歌不復疑  
白日看趨天祿閣青春催入鳳凰池  
三年江漢悲游子萬里關河眇夢思  
早報綉衣行郡邑為騎驄馬慰棲遲

次韻錢伯行江上春暮

太湖之水近當門荇葉芹芽暖正繁  
不問主人還看竹每逢鄰叟為開尊  
燕歸王謝江邊宅犬吠朱陳柳外村

公集四庫全書  
卷一  
步屣春風歸去晚野童篝火候籬根

澤國今年春雨多閉門春盡惜蹉跎雲飛越嶺無書至  
花落吳宮有雁過自笑塞翁猶失馬誰因內史誤烹鵝  
裁成白苧無人聽悵立東風獨浩歌

送鴻山楊士可赴嵯縣巡檢

公子翩翩去莫留好山無數剡溪頭清時不共伯鸞隱  
暇日還從安道游花底蕩舟歌越女尊前把酒看吳鉤  
臨風聽徹黃金縷折贈一枝安石榴



送范德輝赴縉雲教諭兼簡高則誠

不逐扁舟汎五湖，一官迢遞縉雲墟。  
遺民世守軒轅鼎，博士家傳魏國書。  
夜月定聞隣縣鶴，秋風莫憶故鄉魚。  
到州為謝高書記，日日相思賦索居。

題富鍊師仙山訪隱圖

客有子微子，學道居松陵。  
身卧雪灘曲，心將秋月明。  
太湖烟水催揚舫，去訪隱者尋仙靈。  
桃花之源浪得名，何如入海窺蓬瀛。  
蓬瀛樓觀何嵯峨，縹渺金碧之空青。  
扶

桑東枝掛白日巨鼃不動波濤平仙人王子喬乘風下  
青冥要君與君語欣然若平生飲君以沆瀣之微液贈  
君以琬琰之華英授君長生不死之奧旨保君神明愈  
久而清澄丹丘羽客遙相迎足籥浮雲同上征蒼龍為  
車翠羽旂風伯前驅玉女仍直排閭闔朝紫清天上差  
樂人間苦君獨胡為思下土林屋深通水晶府勅制羣  
龍主晴雨指麾豐隆使擊鼓飛廉揚舲馮夷舞馮夷舞  
樂未央昔年往游今故鄉堯舜無為四海康千秋萬歲

下有巢許長徜徉

黃雀行

黃雀何飛飛雄鳴呼雌野草低暮歸莫向空城樓空城  
挾彈多小兒朝飛莫傍東家屋東家鷲鳥食爾肉不信  
但看梁上燕昨日養雛今不見不信更看桑間雉錦翼  
襪爪中死東家公子非少恩彼鷲不仁誰敢嗔吁嗟  
爾生亦甚微彼鷲不仁謹避之

慈烏曲 有序

至正十年夏四月詔賜高年帛吳興沈右以純  
孝稱而其祖母夫人歲九十前後被賜者三而恩  
有加君子既感國家忠厚之澤洽於天下又美  
君之孝樂其親之壽而榮其賜之侈也蓋觀感  
而有歆慕羨艷之心焉於是天台陳基為賦慈  
烏曲以歌之其辭曰

慈烏尾畢逋朝夕且呼哺爾雛今日慈烏一何樂飛向  
樹頭兼屋角飛去飛來鳴且啄門前忽有吏言致篚與

筐中有兩束帛爛爛生天光孫也出見吏再拜陞母堂  
祖母康強年九十受帛拜天仰天立太平恩澤高年及  
歡樂盈門動鄉邑殷勤裁剪製為衣長短於身無不宜  
母著衣孫起舞日日見烏來返哺萬歲千秋荷明主

送李彥章

青絲絡馬頭游宦古蘇州蘇州城東萬斛舟前年運粟  
直沽口送別江亭折楊柳承恩頭插上陽花錫宴尊傾  
光祿酒江上今年楊柳黃辟書千里有輝光勇騎閩外

將軍馬飽食閩中荔子漿閩中女兒歌白苧把酒勸君  
為君舞將軍好文不好武自古閩中稱樂土

空明山人歌

丹丘子空明生結髮為吏干公卿懸河之辨從復衡法  
家之書刑與名少年騎馬入公府白首尋真歸赤城赤  
城仙人下青冥手捧寶籙遙相迎虛皇敕住委羽洞服  
事劉郎為弟兄劉郎乘風朝紫清雲為旗兮霓為旌盡  
留瑤田教種玉約以不死三千齡三千齡在何許來往

東吳復西楚看成珠樹著三花  
笞鳳鞭鸞却輕舉

玉簫引

金華仙人周子竒能吹三十六  
琯之參差疏音間節傳  
自女媧氏上引浮丘公下接  
王子晉來往伊水之濱  
雒水湄緱氏山頭輕作別  
二子不知何所之空留子竒  
子與世同遨嬉厭商欵羽  
雜宮徵龍吟鳳噉能使鬼  
神上下莫得窺端倪昔年  
西王母翩翩會瑤池親遣  
侍女董雙成學得妙曲崑  
丘歸至今縹緲十二之玉  
樓餘音長

繞蟠桃琪樹枝請君休汗漫我欲與爾期若非釣天即  
洞庭仰參軒轅帝俯友虞廷夔後天而老不死長追隨  
周子竒此曲莫向人間吹

次韻鄭山人謝沈存齋贈檳榔木拄杖歌一首

海南山青海波綠秀氣盡鍾嘉草木檳榔刻杖世罕見  
堅潤不數崑山玉沈君乃吾友鄭老真吾師沈君贈此  
不愛惜老子曳之行賦詩七尺之軀既貧且病足晚得  
此杖差勝桂林之一枝出門頓頓增百倍力入海欲踏金



鼇脊又欲逐日窮西極翩然却去謁祝融正值檳榔秋  
有實剖而食之狀如火齊赤蠻烟毒霧不敢侵底用丹  
砂駐顏色擇地而行坎則息深山大谷俱躋攀此杖鏗  
然爪甲間山鬼見之莫敢奪泣淚化為妖血殷檳榔杖  
出南海安得進之於冢宰扶顛持危功用在空令此老  
杖于鄉上下古今千百載

烏夜啼引為秦州趙子威使君賦

有序

閩人王昉字季境為淮東帥府奏差被誣繫揚

州錄事司獄時趙公為泰州以廉能稱部使者  
移其獄使讞之遂乃反寃

烏夜啼在庭樹烏啼啞啞天欲曙阿兒被誣身繫獄盡  
室煩寃受荼毒烏啼胡為繞吾屋下堂喚婦起聽烏忽  
喜淮南兒有書書中報道兒罪脫此樂欣欣天下無兒  
歸拜母為母說泰州使君當世傑執法霜臺舊司臬明  
如青天皎如月寃獄平反解縲紲已死復生誣得雪海  
可枯山可裂使君之德不可滅烏啼愛我庭樹枝我愛

使君君不知使君歸朝奉天子日日聽鳥為君喜

白雁操

有序

梁君出獵其臣公孫襲善其君之聽其言而作  
有羣白雁王其弋諸蠢彼行者王其釋諸匪伊是釋惟  
王之德王德伊何曰宋景公一言之善上格帝衷人獵  
得獸於言何有王獵得言王千萬年

鴻鵠操

有序

晉平公浮於西河感船人固桑好士之言而作

鴻鵠于飛以翮非毳君子好士宜別其類鵠飛冲天其  
有以夫美哉山河守以士夫孰謂彼夫言有旨夫

送王本初縣尹赴鄆城兼簡磁州本中使君

憶昔至正初北游客京師辱交伯仲間日夕相追隨磊  
落青雲器聯翩丹鳳姿媿無高山調酬君白雪辭俯仰  
八九年南歸滄海涯竊聞霜臺上風猷肅網維允矣伯  
氏賢克當明主知仲氏貳安陸重為人所推中朝名公  
後復始非君誰前年復至京伯也官於磁治州如室家

撫民若嬰兒靈草毓三秀瑞麥生兩歧伯也置不言獨  
詠豐年詩凜凜君子風不啻先公為政成報天子寵錫  
有光輝人言古循吏龔黃邈難追孰知忠厚化昔聞今  
見之仲也復為邑郟城鬱巍巍朝廷重守宰簡書有程  
期一門雙南金共下白玉墀又如兩騏驎為主効驅馳  
河水昔橫溢生人四流移桑間為寇攘觸罪茲有司坐  
令齊魯俗採丸盈交遠今君寄民社所念當在茲願試  
父兄術為民療瘡疾君服亦已華君佩何陸離朝發江

之澣暮宿河之湄行當見伯氏為我道睽違

草堂雅集卷一

欽定四庫全書

草堂雅集卷二

元 顧瑛 編

黃潛

字晉卿金華人延祐甲寅中第官至侍講學士與虞  
馬齊名寓吳開元寺時予始獲見遂得其詩集云  
發大都

辭親獨行邁遙遙抵京國胡為托卜沁驅馬更遠適至

尊有時巡樹羽殷阡陌宿衛必近臣顧問須耆德陋儒  
亦何知冗從同執戟草深原野青雨暗關塞黑寥寥盛  
年意眷眷游子色一身萬人中敢不思努力

劉黃祠堂

劉君古遺直祠堂在丘園嗟此豪俠窟文雄歛孤騫平  
生二三策匪微明主恩瑣瑣談失得無乃市井言憑高  
一長望苦厭車馬喧微風過疎雨青山滿前軒陰晴歛  
異態浮雲實無根悠悠千載心去去勿復論



居庸關

連山東北趨中斷忽如鑿萬古爭一門天險不可薄聖  
人大無外善閉非鍵鑰車行已方軌關吏徒擊柝居民  
動成市廬井互聯絡幽龕白雲聚石磴青泉落地雖臨  
要衝俗乃近淳朴政須記桃源不必銘劍閣僕夫跽謂  
我無為久淹泊山川豈不好但恐風雨惡

榆林

崇崇道旁土云是古長城却尋長城窟飲馬水不腥斯

人亦何幸生時屬休明向來邊陲地今見風塵清禾黍  
被行路牛羊散郊坰儒臣忝載筆帝力猗那名

槍竿嶺

憶昔賜第歸吾母適初度蹉跎歲月晚今辰乃中路居  
人誇具慶游子慚叱馭茲山稱最高揚鞭入烟霧蠹蠹  
多峭峰濛濛饒雜樹崎嶇共攀援躑躅頻返顧陳情未  
成表登高詎能賦獨憐桑乾水還向盧溝去

李老谷

緣崖一徑微入谷雙崦窄密林日易曛况乃雲雨積行人望烟火客舍依山色家僮為張燈野老煩避席未覺風俗殊祇驚關河隔嚴程不可緩子規勿勸客

赤城

雞鳴秣吾馬晚飯山中行何以慰旅懷赤城有嘉名灘長石齒齒樹細風泠泠時見岩壁間粲若丹砂明溫泉發其陽撝呵効百靈前峯指金閣真境標殊庭白道人跡踈青厓雲氣生信美無少留緬焉起深情

龍門

竦身望龍門，緩轡行兀兀。溪迴愁屢度，雨橫驚暴溢。兩  
厓儼相向，百水怒爭出。人言馬上郎，快意每多失。自非  
渥洼種，不得矜捷疾。飄飄蟻虱臣，凜凜龜鼉窟。皇靈重  
覆冒，利涉用終吉。迴睨向所經，千嶂隱朝日。青林外盤  
紆，黃流中蕩滴。後來未渠央，君子宜戰慄。

獨石

解鞍及亭午，稍欣烟霧收。蒼然衆山出，歷歷如雕鏤。前

瞻一石獨靈宮居上頭頗聞去年夏水激龍騰湫走避  
登屋山夜半齊呀咻幸茲溪澗中今作清淺流宴安不  
可懷變化誠難求翠華渺在望行矣毋淹留

擔子窪

自從始出關數日走崖谷迢迢度偏嶺險盡得平陸陂  
陀皆土山高下紛起伏連天暗豐草不復見林木行人  
烟際來牛羊雨中牧颯然衣裳單咫尺異寒燠佇立方  
有懷相逢仍問俗畏途宜疾驅更傍灤河宿

李陵臺

日暮官道邊土谷容小憩漢將安在哉荒臺猶髣髴低  
回為之久懷古增歎歎長風吹曠野飛雪千里至蕭條  
蒼山根草木餘爽氣常憐司馬公子奪多深意奏對實  
至誠論錄存大義史臣司述作遺則敢失墜

上都分院

晨興過桓州旭日生蒼涼舉頭見觚稜金碧何巍煌洪  
河貫其前青山環四傍暮投玉堂署鼇峯屹中央升階

旅羣彥官燭分餘光琴冊森在側談笑來清觴列坐無  
所為陳詩詠黃唐帝鄉豈不樂父母遠莫將起視雲漢  
低垂星爛寒芒南飛有冥鴻邈哉天際翔

右紀行詩十二首虞伯生題云少陵入蜀路崎  
嶇故有淒涼五字詩應奉為官隨翠輦固應同  
調不同辭

雜詩五首

日月東西行羣動亦不息寄身萬物中寧獨謝茲役所

以魯中叟遑遑走南北聖哲諒已然旅人能久息

晨起步西園旭日朗以清葵花衆草中煜煜敷丹榮流  
光非汝私獨爾心自傾覽物有深懷佇立方含情

璞玉與寶劍淪落初未偶君看被湔祓各在千年後將  
身比金石誰當獨長久悠悠百代下相知復何有

孤雲淡無心出山偶為雨長風忽吹散渺渺歸無處唯  
餘向來山突兀青如故慷哉魯仲連功成身已去

春風著萬物欣欣皆自私可憐兒女花榮悴更相持獨



有澗底松偃蹇如不知何疑揚執戟草玄鬢若絲

效古五首

上山見明月下山月相隨月豈知愛我我行自見之故  
山日已遠故人不可思殷勤謝明月願爾無時虧

女美衆所悅士窮衆所輕輕重安足言泥盡水自清淮  
陰初寄食曲腰胯下行季子黃金多妻嫂來相迎自古  
已復然歎息空吞聲

擊石乃有火石火光不揚攀天亦有路天高路何長嗟

我萬古雲下覆歌哭場富貴誠足多貧賤不可忘

落花隨風吹各自東西飛花飛既不息水流復無極同  
生不同歸能勿異顏色木生則有枝豹死則有皮悠悠  
岐路間多言亦奚為

飲酒莫盡醉盡醉無餘歡讀書莫弔古弔古多悲酸蕭  
艾蔽中野白露摧芳蘭鳳飢不得飽鴟梟食琅玕去去  
復去去采芝青雲端

古詩三首

皎皎綠窻女明晨弄鳴箏終朝不成曲宛轉何為情揚揚青蘭花流芳耀初榮可傷無人采但恐秋風生

南門臨廣路南北何多歧躑躅顧所從吾今信安之故山豈不佳亦有平生期且復回吾車勿受塵世欺

清晨掩書坐忽忽有所思所思非親故千載多異時南山何蒼蒼上有青桂枝吾將折其榮歲晚庶自怡

古意

荆人初得玉趺足辭岩阿持獻萬乘君君門正嵯峨誰

其尸國工謬以石見呵迷邦誠不忍欺君反同科臣口不自明臣心終靡它抱璞重再拜呼天淚滂沱淚盡血可繼玉在良已多是事古則然嗚呼今奈何

人事如草木

人事如草木一氣榮悴之外物何預人而萌喜與悲堂堂異姓王昔者勝下兒窮通本解后達者固不疑阮生亦隘人慟哭真奚為

煌煌明月珠

煌煌明月珠未害居濁水君看黃河黃豈解污清濟我  
方遺吾形寵辱齊一指懸知破琴戴未若參撾禰

浮雲蔽白日

浮雲蔽白日羣動何喧喧嗚呼麒麟兒化為猴與猿登  
高望四荒但見黃河奔誰哉沂其流與我歸崑崙萎蕤  
青林花霜霰日已煩歎息復奚道山中桃可攀

雜興三首

運化奄遷變舉俗喪其真嘒嘒夸毗子詭時稱逸民偶

然隨紛華目謂許與莘蚩蚩良可矜中田翳荆榛淳風  
去無還迷途同所遵首陽勵高節千載誰與倫

白日出扶桑天雞忽先鳴飛奔各自逞爪牙正從橫賢  
哉五柳翁偃卧草不驚生死莫我累豈復外慕嬰經營  
彼奚為欲與元氣爭終歲卒自苦嗟哉獨何成

渾淪本無象質散風乃漓後王初尚賢佞忠遂分馳陳  
蕃偶高義鳳舞鸞更隨彼哉聚蚊蠅營營何繁滋至今  
黨錮傳讀之令人悲掩卷吾何思思彼巢居時

連雨雜書五首

蕭蕭十日雨出門竟何之不愁道路難所懼沾我衣悠  
悠看屋梁作計亦已痴有酒不解飲且遂歌吾詩

昔慕栗里翁頗復志耕耘偶入翰墨場把筆學為文偃  
蹇獨何來喧啾復沍沍念彼荷蓑子窮年愧其勤

虛堂坐無言繼繼悲宿昔常時眼中人已如不相識剥  
啄者誰子念我喜折屐忽去已迨暮一笑岸玄憤

我思仇山人山川莽回互十書九不到木落歲頻暮頗

聞近移居併失夢中路得無挈妻兒倒載入山去  
今日曷不樂孤偶無與酌兀坐把書卷展玩不自休借  
問誰所為其人己千秋山雨不堪聽撥書置牀頭

述懷

端居有多感求志無餘營夙違金門路緬愛丹丘名謬  
忝君子顧捧身廁羣英卑棲念遠引窘步速先征俛默  
敦宿尚低回阻平生伏枕勸中夜攬衣寄遐情上天廓  
澄稷列宿揚光晶俯視林木改仰悲鴻雁鳴跂余秉微



素十年守柴荆希世乖近務慕隱餘衷誠願言良時晚  
庶保幽人貞

題任上人松風樓

長松四簷間落落無與伍天清嘯歌發肯作兒女語道  
人有真聽無諦亦無祖尚不知有耳况覓聲處所起視  
南山高明月在庭戶應念朝市人聞雞走風雨

題晉卞將軍墓

江左失其御強臣布中區歡娛一以乖狂獠無趙趙黃

屋播草野彤庭交劍及事樞始誰秉捧首如奔狐偉茲  
百世士死與二子俱孤忠耿未滅足以孚豚魚義旗果  
東指白日開天衢孰定撥亂功之人或其徒伊昔大雅  
廢語言鄙文儒禾黍已橫委衣冠尚舒徐屹然見砥柱  
獨障狂瀾趨大節固如此捐生乃其餘青簡煥遺烈蒼  
榛悶幽墟日夕悲吹多天高年運徂世方用骯髒猶將  
愧玄虛江濤渺在望雪涕空漣洳

同王待制校文上京八月十五日宿龍門驛

涼風墮黃榆萬馬皆南馳而我方北首度關及鳴雞石  
路幽更阻僕夫慘不怡徐驅待明發決濟窮烟霏貂裘  
者誰子怪我逢掖衣為言霜露多皇皇獨安之我非不  
自憂簡書今有期憶昔州縣間折腰向小兒荏苒二十  
年白首初登畿同袍如燕鴻去住常相違悠然慨平生  
與世何參差瞑投龍門驛高館臨迴溪青崖拱白月水  
木含餘暉秋色故瀟灑我行殊未遲相從况魁彥迴若  
珊瑚枝衰暮奚足云一觴聊共持

金史紀事本末卷二  
卷二  
雨中次范德機見寄雜興

窮巷積陰雨，離居寡悰情。  
安得埽埃風，逍遙予上征。  
長日有逝川，春花無晚榮。  
永懷中澤居，好趣潛英聲。  
於陵方灌園，龐公不入城。  
君意豈忘世，咏歌以濯清。  
今我夢江國，噉噉鷓鴣鳴。  
不憂芳草歇，但恐白髮生。  
歸休企前哲，矢言著真誠。  
悠悠莫識察，思子攜手行。

送李唐卿御史

去去紅塵外，秋光滿華嵩。  
故鄉歸衣錦，行路避乘驄。  
未

覺長安遠真成冀北空  
燕山一枝桂回首正西風

風雨

風雨急如此空山方晝眠  
故應為計拙可復要人憐  
燈火羌村塢桑麻杜曲田  
悠悠今視昔把卷一茫然

五月二十日

不擬芙蓉佩終然挂寂寥  
百年多事始千里一身遙  
巢燕驚華屋鞞鷹望碧霄  
蒼蒼叢桂樹愁絕小山招

聞方壽甫卧病

吾子仍多病何人共解顏水聲和樂白春色閉松關積  
雨連三月懷人劇萬山同游况零落浩蕩豈追攀

憑軒

信有儒冠誤憑軒意欲迷山深風雨急天濶羽毛低他  
日開炎瘴連城送鼓輦荷及吾愧爾未敢歎塗泥

明月樓

遺堞何年有飛甍歷上頭鼓輦分大幕香火望靈湫曲  
岸舟如失遙沙樹欲浮登臨且吾土未敢恨淹留

含香道中

殘日亭猶遠，輕風帽易斜。  
稻畦低沒鶴，草徑曲行蛇。  
經世知無策，謀生會有涯。  
殷勤理黃菊，留眼待秋花。

九日登石頭城

背郭鶯塵遠，高秋川岳清。  
幽情初曠蕩，陳跡故縱橫。  
遙望龍蟠舊，長吟蟻穴爭。  
紺園隨處闢，粉堞向來傾。  
發草窺簷井，看碑驗故塋。  
山開蒼耳路，亭愛翠微名。  
遠樹淮南出，滄江鳥外明。  
人烟川浩蕩，風物歲崢嶸。  
吹帽仍佳。

節傳觴但老兵愚生雜蛙黽浪走媿璜珩去去帆檣盡  
蕭蕭蘆葦鳴登高未成賦覽古獨含情政復哀王粲何  
堪厭禰衡敞廬滄海曲目斷白雲生

題高房山青山白雲圖

十年失脚走紅塵忘却山中有白雲忽見畫圖疑是夢  
冷花涼葉思紛紛

有感

橘柚青黃照眼垂秋風籬落自紛紛披頗聞玉食登蠻果



不獨涪州有荔枝

題明皇春游圖

楊柳烟深却翠輿  
玉鞍可是要人扶  
忍將此日春風筆  
更寫青驄蜀棧圖

送張秀才歸里

青陽河畔杜鵑啼  
歸路如弦定不迷  
應到故山叢桂裏  
笑人騎馬聽朝雞

漫書

漢室需材訪隱淪  
販繒屠狗各求伸  
安知風雪南山下  
別有當年射虎人

題懸厓蘭

嫋嫋春風一樣吹  
托身高處亦何為  
從渠自作顛倒想  
要見懸厓撒手時

次韻答薩都拉宣差

蕭蕭兩鬢愧陳人  
曾向龍門看躍鱗  
多謝參軍留客醉  
杏花猶帶曲江春

次韻虞侍講上京道中

欲去仍為一日留，玉京中夜有詞頭。  
歸鞍曉逐南飛雁，猶及西湖一半秋。

次韻張右司秋日燕集

翠華縹緲五雲間，留鑰初嚴虎豹關。  
坐飲玉泉歌既醉，絕勝拄笏看西山。

待漏東華曉正寒，北門供奉獨優閒。  
賡歌未辦清新句，空愧江南庾子山。

北山紀游

天風吹我度崢嶸春著千巒蒼蒼青紫陌紅塵寧有此  
十年空負北山靈

却問仙山去幾程白雲如簇近相迎直須不脫登山屐  
行盡松聲與水聲

獨看飛花逐水紅不知身過亂雲東回頭旋覺峯巒別  
惟有青天面面同

坐愛春泉響翠微玉花吹濕薜蘿衣何由著我冰壺洞

卧看青天白練飛

削立城心雙白塔幾疑日月費撐支一朝頓在闌干底  
始悟從前見處卑

闕下口號

適駿先猷在作人忝陪多士奉明綸端闈乍起清光近  
臚句高傳茂典新奎壁照臨回景運風雷鼓舞契昌辰  
不才何以酬天造徒詠菁莪樂至仁

賜第後歸謁郡府丞為置宴口號

拜賜才沾雨露香又驚盛典出黃堂鳴騶合選紛千騎  
坐席雍容累百觴他日同鄉修故事不才終古被餘光  
承宣德意逢明牧諸彥能無共激揚

賜廳宴集之明日鄉先生復為置酒重述口號

去年此日宴瑤林雨露光華映古今稱慶謬承賓禮重  
徽榮彌覺主恩深少須天詔從容至坐看宮花取次簪  
千載竒文寄來括可應外物累初心

十月十日去都城

倦客愁深素髮生  
分甘投劾謝塵纓  
老來每愧公車召  
歸去何須祖帳榮  
紅葉早霜催歲晏  
白鷗野水與雲平  
腐儒漫仕真無補  
深負岩居與谷耕

朝擁臯比夕短檠  
病餘靜息厭勞形  
閒情只合營三徑  
便腹那能貯五經  
忝侍禁幃慚啟沃  
欲尋耆社覺凋零  
歸歟嘯傲西湖上  
時看飛雲度翠屏

送王府教授蕭九齡

三千里外雁山雲  
客路相逢酒一尊  
衣錦未須歸故里

曳裾且復向王門淮南桂樹秋偏好京洛風塵日易昏  
愧我倦游成白髮臨分握手欲何言

怡山

春雲牢落雁無聲沙岸參差石有稜雙屐謾窮芳草徑  
一龕長愧白頭僧晴濤閃閃翻孤日山木昏昏掩翠藤  
後夜清風滿遙念夢游空指上方燈

草意

淡烟斜照日離離謾吐芳心欲向誰可是忘憂能自得



若教指佞定無私東風江上何人識南國春來有夢知  
但把青青承雨露未應紅紫浪相疑

梳頭得白髮

偶逐飛雲別磗岡解纓聊爾濯滄浪襟懷久已無山水  
容鬢誰令有雪霜未必丹砂真却老何須白首更為郎  
前修未遠斯文在努力無愁岐路長

送吳良貴之京口學正

此行登覽信奇哉可為尋常富貴催湖上春光隨馬去

淮南山色過江來壯遊未減西園樂逸唱能容弟子陪  
白社古人今送盡薜蘿烟雨重徘徊

送韶文游京口

不到南徐三十春好將夢寐弔遺民也知往事隨流水  
祇想重來是後身棹響官河風色暮雲離野服鬢毛新  
舊游偶失扶桑路煩向滄江一問津

金陵懷古

五雲零落渺天涯陳迹蒼茫日易斜畫角已吹邊塞曲

紅藍新長內園花獨憐遺老埋黃壤曾見春風望翠華  
好在北山猿與鶴依然同住舊烟霞

三月三日西湖舟中

黃塵白帽愧平生對客猶稱舊姓名此事懸知三不可  
祇今恐負四難并放舟乍去空濛境送酒元無窈窕聲  
金谷蘭亭嗟已矣不妨時暫濯吾纓

送友歸豫章

已覺栖遲懶曳裾可能為我強躊躇一帆秋色紅塵外

千里江關白雁初建業水清誰共飲潯陽潮斷定無書  
黃金未盡朱顏在莫種桃花學隱居

送王傅朋之桂林教授

丞相威名震百蠻蕭條異代得吾賢官游忽過三湘去  
家學應令四海傳北望犬牙連上國夜占鷄尾直中天  
炎風朔地皆王土未覺青春雨露偏

碧蓮峯下駐飛驂風土遙知久自諳會有新書裨禹貢  
坐聞舊俗化周南深篁盡日迷山鬼毒火無時起瘴嵐

珍重斯文強食飯謾誇丹荔與黃柑

遣興

數盡飛花一愴然壯心迢遞夕雲邊  
十年人事空流水  
二月風光已杜鵑  
過眼青春寧復得  
污人黃土絕堪憐  
故園尚有平生約  
可使蒼苔到石田

寄永十八判官

金榜淒涼四十年  
風流文采故依然  
香山老去誰同社  
栗里歸來尚有田  
懷古坐看西日落  
得春寧問北枝偏

清泉白石多深趣千載心期入近篇

龍潭山

二月清江照眼明避風舟楫滿迴汀  
斷雲挾雨時時黑密葉藏花樹樹青  
習隱未成陶令賦行歌聊共屈原醒  
碧潭光景無消息坐看魚兒點翠萍

客中夜坐

歷歷飛螢度眼明獨檣高枕數殘更  
薄游已斷新彈缺舊業猶餘未棄  
檠一雨送晴初月色百蟲專夜故秋聲

情知三十年非少已覺人間有後生

甲辰清明日陪諸公入西山拜胡侍郎墓回舟湖

中作

日終甲子年直辰持觴遠酹胡侯墳兩漿趁鷗背城闥  
四十有四同舟人半為吳語如李真湖窮岸出水陸分  
舍舟登途指嶙峋少年健步黃犢奔或乃喝道驚春雲  
老翁齒足仍後塵解衣逕眠草如茵前瞻一里趨廟門  
杖藜不得辭艱辛嚴祠高居絕四隣旁為一丘標石麟

升階鞠躬羞藻蘋拜興有相祝有文亦或稽首稱諸孫  
歸途探幽扶荒榛下睨塵土多蟲蟲放舟催發無逡巡  
勝賞莫許窮崖垠開蓬列坐羅羶葷彷彿鄉飲明介僕  
誰歟解事強討論欲以窮達為卑尊美人今代王右軍  
口吐秀句天葩芬雁行拱立何紛紛爭言我公詩絕倫  
龐眉被褐兩山民閉目冥坐方申申艤舟黑亭鴉噪昏  
晴暘吹洒清衣巾裁詩紀實聊云云慎勿浪傳多怒嗔

郎生詩



卿為爾字郎為氏金臺耀日家尺咫尺目光不奪亦不昧  
非痴非狂竟誰使披氈蹋雪留印趾走乞贈言如乞米  
南踰淮江踐蛇虺頰肩兩囊行且止相逢羅列見未始  
珠璣歷落斧繡侈縱閱安得舒日晷胡然有求仍屢跪  
譬飢索餐飽不已瘡痂嗜好掌一抵以頭沐漆那可洗  
春風未許白雲起冰川猶須卧取鯉莫待啼鵲還掩耳

送傅主簿

嘗聞上古之士比屋皆可封有才不必登王公可憐衛

青日尊貴飛將自老風塵中  
傅公平生經濟手却把一  
經今白首隨人騎馬著青衫  
爽氣如虹射牛斗出門大  
笑望長安長安萬里行路難  
行路難知奈何贈公一杯  
酒請公聽我歌崑崙之山高  
魏魏黃河之水清有時浴  
陽年少休太息東山謝公來  
未遲燕昭之士不足云陛  
下盛德如華勛願公功名遂  
身早退魯連小兒能笑  
人

題李坦之學道齋詩文

神仙中人世莫識政以文章為戲劇李生也復可憐人  
手種蟠桃待春色山空歲寒誰念汝青楓墮影霜露白  
遠游賦成一朝去翠蓋雲旗竟何適蓬萊烟霧秋冥冥  
鄧公白鹿無消息袖中驪珠三百顆夜深勿近蛟龍宅  
金華之山青矗天山人看山忘歲年黃精芝草幸可食  
安得與子巢其巔石牀醉聽松風眠無為長歌怨如哭  
使汝惻愴凋朱顏

讀三孔先生清江集

元祐儒臣布星斗後有作者非其偶二龍三鳳何繽紛  
况乃淵源魯中叟適從塵編識英雄想見世澤餘忠厚  
長公平生二三策大廷披腹驚羣后風流班班仲與季  
茅茨采椽絕丹黜獨追古昔寓陽秋稍抉疵瑕到瓊玖  
却盤餘力歸賦詠古硬清圓無不有爰初人文啟河洛  
下逮百氏分戶牖空言可托匪末藝巨筆待援須好手  
典刑未墜乃至今吾生已幸何云後青燈照夜雨如線  
輿論微辭煩擊剖追慕正復慙捧心贊咏胡能付鉗口

從游起死不敢期倘挹殘膏注枯朽

題醉鄉圖

翰林主人天上来布帆不為鱸魚開江湖渺渺天一色  
朝光暮靄相徘徊昔賢心賞餘勝處只有水竹無亭臺  
碑材久已沒荆棘屐齒不復留莓苔後來視今猶視昔  
今我不樂胡為哉大官馬湮遠莫致隣翁綠蟻浮新醅  
欣然一飲便終夕鼻端氣息如雲雷是間別有一天地  
不知何處為蓬萊回觀方外海一粟醯雞塵甕何喧豗

黃冠秘監太狂態騎鯨供奉非  
仙才揮毫政要直學士  
鋒車流水行相催瑤池曲宴多  
雨露歸歟酌彼黃金罍

杭州送兒姪歸里

空江月滿潮聲怒二男勇蹋潮頭去  
故園天末渺予懷  
夢中識汝歸時路起向江樓遙望汝  
江上青楓正霜露  
涼風颯颯吹汝急櫓搖背指龍山渡  
翩然一葉舞中流  
嗟汝童心得無懼自我西遊歷三紀  
舉目交游半新故  
下車相揖何紛紛白頭朝士猶徒步  
玄都觀裏舊桃花

見我重來能幾度。緬思疇昔，仍念汝徙倚闌干，日將暮。  
前潮方斷，後潮續。層波複浪，無重數。魚龍出沒相後先。  
疾雷槌山雨如注，隔岸峯巒空復多。沙際冥濛，但烟霧。  
計程知汝已登陸。息肩弛擔，今何處。明朝我過三釜山。  
能勿徘徊起哀慕。近聞旱魃肆為虐，殺吾手植千株樹。  
且須為我語比隣，莫遣牛羊上丘墓。

送俞器之判官暨陽

苧蘿山前碧溪水，花顏玉貌今誰是。祇見操觚道上兒。

骨束枯柴髮垂耳周家忠厚及草木忍令赤地連千里  
夜飛尺一遣緹屏想見春風下車始憶昔君侯年少初  
欲全季母甘捐軀麻鞋上殿衣見肘歸來束帶懸銀魚  
頗聞兒曹久待哺笄笄萬目同睂盱晨餐秣馬趁所至  
擊鮮上冢無躊躇念君自是醫國手看活羣兒如活母  
平生本草閱已熟野葛山榆尚何取若為箋天乞借材  
盡躋東土歸仁壽鄙夫不用畎畝憂但為作歌貽不朽  
八月四日大風雨中與章德懋同汎江




黑風翻江白雨傾  
檣欹舵側斷人行  
此時惟我與章子  
孤舟蕩漾烟波裏  
蒹葭蒼蒼楊柳黃  
浩歌擊舷興彌長  
翩然一葉恣掀舞  
青山白塔頻低昂  
朝過城南暮城北  
舟人問我將誰適  
童子掉頭作吳語  
秋水夜來深幾許  
忽看大字標竹林  
寺門對水仍陰陰  
敲門見竹不見人  
竹間翠石何蕭森  
回舟少休雨如注  
四顧冥濛但烟霧  
魚驚龍躍吾不知  
披蓑却入菰蒲去  
岸傍羣兒拍手呼  
笑言狂客世所無  
嗚呼古人今則無  
後來視我知何如

為君留此有聲畫題作扁舟烟雨圖

贈俞觀光

寒窓讀書風正悲坐聞剝啄走啟扉衝風蹋凍至者誰  
俞子訪我由剡溪相逢把臂語移時婦女驚笑羣兒痴  
俗物病我不可醫眼明見此珊瑚枝朝來贈我天馬詩  
忽然掉頭去莫羈鼻頭氣息干虹霓詎能折腰向小兒  
文章技癢聊爾嬉策勳聖世今毋遲繫我愛子莫助之  
臨歧躑躅徒嗟咨



草堂雅集卷二